

兩廣總督岑廣東巡撫張會奏裁營練兵摺

竊中國今日處積弱之後值多難之時欲圖固圉保民實以練兵爲最亟顧練兵關繫之急之重盡人莫不知之 朝旨復屢促之各省猶未能大有所舉者固由將才之消乏而其大端則實由於餉項之難籌也廣東接壤強鄰且爲海國必須有至精之陸軍二三萬人至精之海軍一隊始足以屏藩南服乃察廣東水師雖有輪船數十艘祇足供內河巡緝之用以守海口且不足更何能語於海軍至於陸軍亦多窳敗若不大加擴張整頓實不足以建威銷萌臣春煊自上年抵任以來卽與司道籌議整頓擴張之策惟是凡百辦事必先籌款練兵之事需款尤多廣東歲出歲入每年不敷二百數十萬兩無從別籌鉅餉迭經再四籌商惟有全裁綠營騰出餉項以資挹注查廣東綠營除節次奏裁外現尙存官兵二萬八千四百九十二員名無閏之年歲支俸餉等項銀五十七萬七千餘兩米二萬一千餘石有閏之年歲支俸餉等銀六十一萬餘兩米二萬二千餘石今日綠營之無用各省皆然值此庫帑奇絀之秋猶歲糜數十萬之餉以養此等無用之兵深爲非計況迭奉 諭旨裁撤尤不可不急於舉行臣春煊在山西巡撫任時曾奏請將山西綠營全行裁撤廣西綠營亦經臣春煊會同撫臣柯逢時奏裁均無窒礙足見此舉尙爲有利無弊今擬辦法約有三端一曰改

設官缺綠營之所以難於悉裁者以武職官缺之無可繫屬耳今擬仿照山西奏定成案將全省陸軍悉編爲常備續備軍而以陸路提督爲統領以總兵副將爲分統以參游爲營官以都守千總爲哨官以把總外委爲哨長水師則分外海內河兩項以水師提督爲統領餘並如陸軍之制改章之始並請援照山西成案一切人員皆由外間遴選委用俟規模大定再議選補章程由部核辦其裁缺及各標候補人員由臣等調集考驗凡有年力精壯能通文理者或撥入將校學堂或令隨營差遣以宏造就而免向隅至南澳一鎮閩粵兼轄養廉亦屬分領並經臣春煊電商署閩浙督臣李興銳應否裁撤准覆由粵一律奏裁此改設官缺之大略也一曰飭州縣自募土勇營汛旣已裁撤各屬地方不免空虛本應飭辦巡警以資鎮攝但巡警係專門之學斷非倉猝所能辦且經費較鉅亦非各屬力所能及應爲各屬酌定土勇名額飭各州縣自募歸其管帶所需薪糧在裁兵騰出銀米項下撥出四成供支不敷之數即將綠營官兵向收之緝捕經費二成規費全數提撥至各州縣解送人犯錢糧向由綠營派兵護送此後並卽責成土勇護解此改設土勇之大略也一曰請變通舊制綠營分布各州縣與有地方之責是以例定武職各項處分嚴切詳明現擬綠營全裁之後以緝捕清鄉等事屬之續備軍以護解餉犯等事屬之於土勇一切責任自與從前稍異應請

飭部將武職專汛統轄各處分概予寬免暫由外定緝捕功過章程 奏咨辦理此變通舊制之大略也以上三端皆擬裁綠營之大略辦法合無仰懇 天恩俯念廣東練兵重要籌款維艱准其將全省綠營自光緒三十年六月初一日起悉數裁撤一俟奉 旨允准即將常備續備等軍如何改編內河外海水師如何分配官缺如何改設土勇如何飭募暨緝捕功過詳細章程再行分晰具 奏謹 奏

山東巡撫周奏遵 旨改定常備續備各軍並擬添募新兵預籌的餉摺

前奉 上諭著各省將軍督撫將原有各營嚴行裁汰精選若干營分爲常備續備巡警各軍一律操習新式槍礮認真訓練以成勁旅等因欽此溯查舊日東省防營軍名不一積習甚深經升任撫臣袁世凱裁募改併大加整頓將嵩武軍及東字等營編作武衛右軍先鋒步馬礮隊二十營參仿武衛各軍章程更定營制餉章尙稱整齊畫一又將飛虎佐字濟字等營編作左右翼防軍八營歸曹兗兩鎮統帶又將登萊練軍各營編作沿海防軍五營加以撫標前軍左右步隊二營共合三十五營變散爲整汰弱留強已爲常備續備基礎嗣後調任撫臣張人駿暨臣將沿海防軍節次裁改併作馬步二營現計通省共有步馬礮隊三十二營查先鋒隊二十營自編列成軍改練新操漸就精熟可備緩急之用擬請定爲常備